

1 經名：佛說三品弟子經

2 譯者：吳 月氏國 居士 支謙 譯

3 經號：大正新修大藏經 第 767 號經

4

5 佛說三品弟子經

6 聞如是——

7 一時，佛在舍衛國祇樹給孤獨園，與比丘千二百五十人共會說經，賢者阿難從坐起，

8 白佛言：「願欲有所問，唯天中天解說，欲決狐疑。」

9 佛言：「善哉！恣所問，多陀竭當為汝解說之。」

10 阿難問佛言：「優婆塞學道，有上、中、下輩。願佛解之。」

11 佛語阿難：「汝乃為當來、後世發此問，如來當為汝說之。諦聽受，內著心中！」

12 阿難言：「諾！受教。」

13 佛言：「上輩優婆塞、優婆夷受持五戒，不犯如毛髮者。若行教授、開解人者，皆

14 令發菩薩心。何謂菩薩心者？念十方人如視赤子，度人入道作摩訶衍行，具足教授

15 無所希望，不求供養衣被、飯食、珍寶、錢財之物，不為小道，以度人為本。」

16 「何謂小道？」

17 佛言：「以入大法作摩訶衍行，求須陀洹、斯陀含、阿那含、阿羅漢、辟支佛，是

18 為小道，非菩薩。

19 菩薩法者，教授一切，使入般若波羅蜜，解漚和拘舍羅得薩芸若慧。當知是人

20 作行來久，是過去佛時人，供養師父如佛無異，如是行者，為上優婆塞、優婆

21 夷也。

22 中輩優婆塞、優婆夷者，亦受五戒，不犯如毛髮者，亦是過去佛時人。本學道，

23 不值明師，不聞般若波羅蜜，不曉漚和拘舍羅，但行一波羅蜜，布施、持戒、

24 忍辱、精進、一心，不於經法中見慧，逮前功德得入人道，頗有宿識得生法門，

25 守戒完具，視於師父如佛無異，終不犯戒。如是行者，為是中輩優婆塞、優婆

26 夷。

27 下輩優婆塞、優婆夷者，雖受五戒，悉還犯之。

28 若見明師、曉法賢者，便從受問法要，當時歡喜向其悔過罪，更精進五戒，尤

- 1 無反復。
- 2 懷邪欲意，不復持佛戒，自貢高，還自憎明師、賢者，謗說長短。『我更見明
- 3 師戒深慧，當護方便。』不知是師，但食供養，反信受其言，不精經戒。
- 4 是優婆塞、優婆夷，為擔死人種，不當與共會、同坐起，壞人好心，行開化人
- 5 民受其法戒，希望供養，欲得錢財、穀帛，給活妻子，假佛威神，心不念十方
- 6 五道中人欲令度脫，反為受者作想，不語摩訶衍慧，是為不精佛正真之法。
- 7 語受經人言：『當避世間人因緣，多少飲酒，佛有百味之食。』不斷人酒、家、
- 8 不持戒者，若僮、客、奴、婢，請使他人，平殺生耳，起手莫為，非佛弟子，
- 9 復限佛功德。」
- 10 「何等為限佛功德？」
- 11 佛言：「既行開授人民，不欲令四輩聞知。」
- 12 阿難長跪問佛：「何為不欲令四輩聞知？」
- 13 「是優婆塞、優婆夷愚心不解，自謂為黠，實不曉了經中深要之慧，不恥不知，反
- 14 為新學賢者作限礙，不欲令見明解好師。所以者何？欲得獨供養，反蔽障大道。
- 15 是優婆塞、優婆夷，雖為度人，不見般若波羅蜜，不解漚和拘舍羅，是為盲冥
- 16 專行小道，或教人作福，無四等心，施不普及。請彼置此，道法不使。」
- 17 爾四天王太子使者，護佛道神一一記之，稍稍去離之，敕伺、命計、集積累其罪條
- 18 疏名，錄白上帝。年壽未盡，頓遣惡神，因其犯戒之間，奪其餘命，自然墮落泥犁
- 19 中，當更十八獄罪，至天、地燒乃出，或墮一禽獸中，或入人道。若在人道者，當
- 20 在愚癡，不見法家生。
- 21 佛言：「阿難！道宜數數聚會，講說法義不可不障，愚人道當，得斷法、滅佛教罪。」
- 22 諸弟子聞佛說經莫不戰慄，皆正心受教，為佛作禮。
- 23 佛說三品弟子經